

STONDE

CARE PECURE , CARE CAPRE ,
QUANTE STONDE SO PASSATE,
QUANTE BANDE SO SMARITE,
E PIU MAI RINNUVATE .

O PASTORI MUNTAGNOLI
D'ISSI STAZZI IN'ALPELLATI,
CURAGGIOSI E VULINTEROSI,
VOI V'ERATE AZZINGATI.

AGHJE DI STE CUNFINE
QUANT' AVETE TRIBBIATU,
TANTE DONNE IND' A STOPPIA,
DI LUGLIU ANU SPICULATU.

CARU ALIVU BENEDETTU,
TI DUMANDU E TI PREGU
QUAL'HE CHI T'HA PIANTATU,
U RUMANU O U GRECU?

CARE PIAGHJE, CARE MUNTAGNE
VOI CHI L'AVETE CUNNISCUTI
TUTTI I NOSTRI ANTICHI,
CUM'ELL'ERANU VESTUTI ?

PARLATECI DI I NOSTRI BABBONI,
DI A CHERCHERA E D'I PILONI,
DI I' ANTICA CAMISGIA
E DI A BARETTA MISGIA .

DI TUTTI L'OMI DI VAGLIA,
DI PONTE NOVU A BATTAGLIA,
INDUVE CHI MORTI E FERITI
IN FIUME FECENU MURAGLIA.

O MUNTAGNE MAESTOSE ,
FATE SENTE A VOSTRA VOCE
INC'U CULOMBU MARINU ,
DA LUNTANU E DA VICINU.

FATE SENTE , EPOI DI DECI
QUANT'AVEMU AVUTU NIMICI;
QUANTU ST'ISULA TANT'AMATA
DI SANGUE HE STATA BAGNATA.

MA VOI SITE CECHE E MUTE,
E NOI PURTEMU E MUCHE
DI TANTU MALE E MICCA BE,
E UN SAPEMU LU PERCHE.

FRANCESCU MERCURI D'ASCU